

Inatsisartut aalajangiiffigisassaattut siunnersuut Naalakkersuisut peqquneqassasut inuussuttunut timersornikkut piginnaasaqarluartut eqqarsaatigalugit timersornermik ingerlatsinerup saniatigut ilinniakkamik ingerlatsisinnaanissaat eqqarsaatigalugu timersornermut højskolemik pilersitsisinnaanermut periarfissanik misissueqqullugit
(Inatsisartunut ilaasortat, Sivert K. Heilmann og Steen Lynge, Atassut)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisunut ilaasortaq)

Aappassaaneerpeqarnera

Ataatsimiititaliaq qutsavigaara suliaasaq peqqissaartumik suliarineqarsimammat.

Ataatsimiititaliami amerlanerussuteqartut allannguutissamik siunnersuuteqarsimapput, taannalu ima nipeqarpoq: *“Inuussuttunut piginnaasalinnut siunissami ilinniagaqalernissamut piareersarnerminnut peqatigitillugu timersornermik ingerlataqarusuttunut naleqqussagaasumik timersornermut højskolimik pilersitsinissamut periarfissanik misissuinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.”*

Tamatumunngalu tunngavittut ataatsimiititaliap aallaavigisimavaa siunnersuutaagaluartoq anguniagaasoq tassaasoq Kalaallit Nunaanni Timersornermut Højskolimik pilersitsisoqarniarloq tamaallaat nalinginnaasumik peroriartuutaasunut ilinniagaqarnertut, kisiannili piginnaasassanik atorneqarsinnaasunik tunngaviusunik pissarsiffiusussaannngitsumik imaluunniit ilinniagartuunngorniarnissamut piareersaataannngitsumik. Paasinninneq taanna højskoleqarnermut inatsimmi paasinninnermut naapertuummat, Naalakkersuisut paasinninneq taanna ilalersinnaavaat.

Soorlu ataatsimiititaliap isumaliutissiissummi nalunaarsimagaa, højskolit imminnut pigisuupput. Taamaattumillu Naalakkersuisut ataatsimiititaliap siunnersuutaa imatut paasivaa, Naalakkersuisut peqquneqartut maanna højskoliusunut marlunnut oqaloqateqalernissamik neqeroortigisartakkaminnik allannguisinnaanerata pillugu, aammalu misissorniarlugu avataani allanik soqutigisaqartoqarnersoq timersornermut højskolimik pilersitsinissamut.

Kiisalu Naalakkersuisut paasinninneraat pisussaaffiliisoqartoq højskolini pioreersuni timersornermut immikkut sammivilimmik ingerlatsisoqarsinnaanerata ilaatigut aningaasatigut kingunerisassai pillugit misissuisoqassasoq, kiisalu illuutitsigut pisariaqartitsineq qanoq ittuunersoq timersornermut sammivilimmik højskolini pioreersuni ingerlatsisoqalissappat.

Tamannalu tunuliaqutaralugu Naalakkersuisut allannguutissatut siunnersuut peqataaffigisinnaavaat, akuersissutigineqarnissaalu inassutigalugu.